

Bouônjour bouonnes gens, ch'est mé, acouo eune fais, Colin Ireson, tchi vos présente 'Eune Lettre' chu Sanm'di, lé 29 dé Novembre, 2025.

Preunmiéthement, pouor vos ramémouaither, nous, l'Assemblée d'Jèrriais, j'avons not' Sèrvice dé Noué Sanm'di lé 6 d'Dézembre, à l'Églyise d'la Pâraisse dé St. Jean à 2.30h dé l'arlévée, et pis un théé, gratuit, dans la Salle Pârrouaïssiale à l'aut bord d'la route. J'avons déjà eune chînquantaine dé gens tch'ont mîns lus noms bas, mais y' a du run pouor acouo d'pus. S'ou voulez v'nîn, donner vos noms s'i' vos pliaît à Mme Marianne Sargent, sus 715736.

Malheutheusement, la s'maine pâssée, à la Salle Pârrouaïssiale dé St. Louothains, y' avait raiqu' eune vîngtaine dé vous tchi v'naient pouor not' arlévée d'gammes dé tabl'yes – y' avait des cartes cèrtainement, mais *Jenga* - des p'tits morcieaux d'bouais à bâti eune tou et pis éprouver dé haler les morcieaux d'avant qu'ou tchaie - 'tait si populaithe! J'vos d'mande à supporter nos arlévées s'i' vos pliaît, rédguliéthement. N'oubliez pon qu'ou pouvez payi vos souscriptions dé dgiêx Louis pouor l'année étout, quand ou v'nez.

Comment qu'ous êtes avec chu temps? Tchi plyie! lé gardîn est bein mouoilli! Et comme i' faisait froid la s'maine pâssée! La tempéthatuthe s'baïssit par à bein près 12 degrés avau deux jours, et la mé, pouor mé, acouo à nagi? 11.7 degrés. P't'êt' j'ai finni à nagi pouor ch't' année!

En pâlant d'la plyie, ch'tait chu mais en 1990 quand l's États déciditent, à la fin, à înnonder la Vallée d'la Reine, auprès d's années et d's années dé distchussions! La décision d'l'înnonder par la Compangnie dg'ieau d'Jèrri, fut prinse dans l's années septante, mais à cause des objections, i' prînt eune trentaine d' années pour finni la tâche! Rappel'-ous qué Mons. David Bellamy vînt d'l'Angliétèrre pouor supporter les Jèrriais tchi n'voulaient pon un réservoir? Et l'Înspecteu Jim Bergerac, du Bureau des Êtrangiers (à Haut de la Garenne!) tchi d'meuthait dans la vallée dans ieune des maisons d'fèrme? Quand i' visitit un agent d'înmeubl'ye en chèrchant eune aut' maison, à cause dé l'înnondâtion, lé programme montrit des portraits d'la Vallée.

Chu mais en 1948 'tait hardi împortant pour les femmes tchi voulaient prendre comme politicienne, Dlle. Ivy Forster, lé preunmié Député feunmelle, ou fut élue pour lé Distri no.2 à St. Hélyi. S'lon la tradition dé chu temps-là, san nom fut écrit comme Mme Ivy Forster! Ou 'tait la soeu à Louisa Gould, tchi, avec sa soeu et san frêthe, Mons Harold Lé Druillenec, muchîtent les esclaves Russes duthant l'Otchupâtion. Sans doute, ou pouvez ramémouaither qué Louisa fut tuée à Ravensbruck, mais Harold survêtchut san temps à Belsen, probabliément

la seule pèrsonne Brittanique tchi fit chenna. Ivy fut pèrsuadée à prendre pouor Députée par lé Bailli à chu temps, lé Sieu Alexandre Coutanche M.B.E. Il avait rencontré Ivy quand ou donnait un discours auprès un dîner, appathemment tchiquechose qu'ou soulait faithe bein rédgulièthement, ou 'tait si populaithe.

Lé Sieu Alexandre fut né lé 9 d'Mai, 1892, tchi bieu présent pouor s'n annivèrsaithe quand i' prînt lé s'rendre ès Allémands en 1945, not' Jour dé la Libéthâtion - à l'âge dé 53! Mais y' a quâsi rein mentionné dé s'n annivèrsaithe dans l's histouaithe. I' mouothit lé 18 d'Dézembre, 1973, à l'âge dé 81, à St. Brélade.

Et bein, né v'là assez pouor ma Lettre, mes quat' minnutes sont finnies, ch'est chîn minnutes achteu! J'espèthe dé vos vaie à not' Sèrvice dé Noué à St. Jean, la s'maine tchi veint, lé 6 d'Dézembre. Mèrcie bein des fais et à la préchainé.